



Ils sis candidats per la regenza ch'èn stads a l'occurrèza a Laax: Jon Domenic Parolini, Andreas Felix, Marcus Caduff, Peter Peyer, Walter Schlegel e Mario Cavigelli (da san.).

FOTOS G. N. STGIER

«Sfurzar d'ir cun skis na savain nus betg»

Laax: Discussiun al podi cun ils candidats per la regenza

DA GION NUTEGN STGIER / ANR

■ **La promoziun dal turissem, il sustegn da l'economia, pcurar per meglras cundiziuns da basa e persvader uffants d'ir pli savens cun skis. Quai è stads ils temas centrals da l'occurrèza la damaun a bun'ura al Crap Sogn Gion, organisada da Penderas Grischun.** Il 2010 intgins mais avant las elecziuns da la regenza ed er il 2014 ha l'organisaziun tetgala da las penderas da la noss chantun envidà ils candidats per la regenza la damaun sin far di ad ina occurrèza in pau insolita. Stà il cas è quai er ier a Laax nua che la damaun ha cumenzà cun ir sin pista al Crap Sogn Gion da las 07.17 fin a las 08.15, lura in ensolver en cuminanza e suenter la discussiun al podi. Cun excepziun da cusseglier guvernativ *Christian Rathgeb*, che ha gi da renunziar a l'occurrèza cun esser malsan, eran ils ulteriurs sis candidats per la regenza tuts preschents.

Naginas subvenziuns, mabain bunas cundiziuns

La societad illustra cun blers represchents da la politica, ina rotscha directurs da penderas ed auters interessads è vegnida benventada da *Reto Gurtner*, il patrun dal'entir maschi da l'Arena Alva SA. El ha cunzunt fatg attent quant flexibel ch'in travagl da penderas haja d'esser, gist en vista a l'aura savens variabla. La politica haja da rinforzar mintga interpresa e far sappia ella quai be cun crear meglras cundi-

ziuns da basa. «Nus na duvrain naginas subvenziuns, dentant cundiziuns generalas adequatas», ha menziunà Gurtner. Da reglar sajan na ils problems actuals, persunter quels che vegnan en il futur, ha accentuà il Sursilvan. In manaschi avess da pudair decider autonom e na las bleras autoritads. Ultra da quai mancan savens er la solidaritad e la tgapientscha envers travagls e cunzunt er societads da penderas, ha manegià Gurtner.

Las regulaziuns vegnan da Berna

Manà la discussiun al podi han *Martina Febr*, la redactura principala da la «Südschweiz» e *Luzi Bürkli*, il caporedactur dal «Bündner Tagblatt». Pertutgant la promoziun dal turissem e da l'economia ha cusseglier guvernativ *Jon Domenic Parolini* ditg che la regenza sustegna gugent projects innovativs che sajan da fundament. Ella prendia dal reminent er ils documents sut la marella e guardia er la situaziun finanziaria avant che sa mussar generusa cun l'investur. Ultra da quai haja er la regenza da sa tegnair, er quai che pertutga lubientschas e cundiziuns, a las regulaziuns fundamentalas che na vegnan per gronda part nà dal chantun, mabain da Berna, ha menziunà il cusseglier guvernativ da Scuol. Concernent cooperaziuns sappia el confermar la buna collavuraziun da la regenza cun las grondas organisaziuns turisticas ed economicas sco Hotelleriesuisse Grischun, Gastro Grischun, Penderas Grischun ed er l'Uniuin tetgala da commerzi e masterg.

«Entaifer la regenza è la collavuraziun fitg buna»

Cusseglier guvernativ *Mario Cavigelli* ha sustegnì ses collega Parolini e ditg che l'iniziativa, il curaschi ed er ils daners per realisar in project hajan da vegnir dal maun privat e na partout dal maun public. Il chantun examineschia mintga project e saja er adina pront da gidar, ha menziunà il president da la regenza. Er quai che pertutga la surdada da lavurs, en spezial tar la construcziun bassa, resguardia il chantun tant sco pussaivel l'economia locala, ha ditg Cavigelli e quai cler. Sin dumonda sche la cooperaziun entaifer la regenza saja buna ha el ditg che quella saja fitg agreabla. Che mintgin saja in cumbattant singul,

quella pretensiuns na constettia insumma betg.

Collavurar real

Andreas Felix, el che candidescha per la pbd per la successiun da cusseglier guvernativa *Barbara Janom Steiner*, è da l'avis ch'ina regenza haja da collavurar real. Discussiuns contraversas sajan tuttas, dentant a la fin sajan ils fatgs la realitad. Concernent la promoziun dal turissem e da l'economia haja la politica da metter a disposiziun il champ per giugar, dentant da giugar quai hajan ils «profis», ditg auter ils patrums ed impressaris.

Memia bleras sfidas administrativas

Walter Schlegel, el che vul far il zap en la regenza per la pps grischuna, è persvas che cun damain sfidas administrativas, cun in pau damain birocrazia e cun dapli intelletg uman davart da la politica, dal chantun e da la confederaziun avesian il turissem e l'economia segir bler pli simpel. El ha er ditg che la regenza avessia d'avair dapli curaschi da sustegnair intgins projects ed er esser pli liberala quai che pertutga lubientschas da construcziun, ubain esser cun mintgin egal.

«Scola è anc adina scola»

In tema è stà co entuisasmar uffants per ir dapli sin pista. Cun excepziun da *Peter Peyer*, il candidat socialdemocrat per la regenza, èn ils auters tshintg candidats tuts stads da l'opiniun ch'i saja da far insatge en quella direcziun. D'introducir l'ir cun skis sco in rom en scola, quai saja cumpletamian sbaglià, ha ditg il deputà Peyer. «Scola è anc adina scola», ha el ditg pulit serius. Far sport en ina moda u l'autra en scola, quai saja en urden, dentant champs da skis, quels tutgan al passà. *Marcus Caduff*, el ch'è d'asper Mario Cavigelli il segund candidat da la pcd per la regenza grischuna, è pertschert che da guardar ch'uffants gajan dapli sin ils skis saja fitg impurtant ed er in aspect impurtant per las penderas. «Sfurzar ils scolars d'ir cun skis na savain nus betg», ha manegià il Lumnezian. La realitad saja che sche daplis skiunzs sajan sin pista profiteschia l'entira regiun e schizunt er il spital da Glion, nua ch'el saja il directur.



Duas personas che vivan per las penderas e per il turissem: Silvio Schmid e Reto Gurtner (da san.).



Cusseglier guvernativ Mario Cavigelli (a san.) cun deputà Maurus Tomaschett.



En cuminanza a maisa: Walter Schlegel e Marcus Caduff (da san.).



In cristiandemocrat ed in socialdemocrat: Dumeni Columberg e Peter Peyer (da san.).



Da Scuol a Laax èn vegnids: Andri Lansel ed Andri Poo (da san.).



Er stada a l'occurrèza è la deputada Elita Florin-Caluori.